

PIO V. PONTIFICI OPTIMO MAXIMO.

MARIANVS VICTORIVS REATINVS.



ACROSANCTAM Christi ecclesiam Beatissime Pater, quæ supra firmam petram ædificata est, numquam cessat, ab initio incipiens, humani generis hostis concutere, & ad ruinam omni conamine impellere. Idq. partim molitur per ethnicos, & a religione nostra alienos homines; partim, & multo ualidius per domesticos illius inimicos hæreticos. Qui quidem, ut testatur. D. Ioannes, ex nobis prodierunt, sed non erant ex nobis: Si enim fuissent ex nobis, permansissent utique nobiscum. Domesticos autem hostes, ideo uocaui, non quod extra ecclesiam illi non sint (quippe cum ex ea prodierint) sed quod intra illam se esse dicentes, sub Christi nomine Antichristum nobis sequendum proponant, & pro ecclesia Dei synagogam Sathanæ introducant: hæresim Euangelium, mendacium ueritatem appellantes. Hæc pestis statim initio nascentis ecclesiæ exorta est, & ueluti infelix lolium, & steriles auenæ, una cum Dominica semente emerit. Quis enim nesciat (prodente id ipso patrefamilias, qui bonam seuit sementem) statim simul cum tritico zizania exorta? & uix annunciato Euangelio, extitisse Cerinthum, & Hebionem, & deinde huiuscemodi monstra prope modum infinita? quæ illud uarijs artibus, diuersisque sophismatibus subruere conati sunt: cunctis ecclesiam in suas partes trahentibus, & euangelij ueritatem apud se solos illibatam manere, perfrieta fronte mentientibus. Equidem dum Hiranæi, & Epiphani libri contra ueteres hæreses lego, & tot diabolica figmenta; ac ueluti aniles quasdam fabulas in eis considero, non possum totus non horrescere, & intramemet collectus, non plurimum ad-